

di dooch di woän wi brausebulfa  
di maadla homm füä iä bubbn klaadla gschniddn  
miä buum homm kaulkwabbn gfangä  
mid am daschnduch fom forrä  
orrä schdichling  
gschbild hommä  
huggliberrifinn un domm soiä  
un dadsanläs  
un indianäläs  
un wi mä a weng äldä woän  
hindä di büschla doggdäläs

---

di reechnids woä a schdoggfauls drumm  
un hodd - däs homm di grössän gsochd -  
rächd gschdungn  
miä homm däwail an radds däschlong  
un di besd goobl ausm silbäbschdegg  
an ool nain rüggn kaud  
droom buuchä weeä

---

weeä sich gädraud hodd  
fom erlösäschdeech dsä hübbfn  
deä hodd dsä uns gäkööd  
un weeä so waid nain obflussroä  
fo deä kanalisaddsion gägrabbld is  
dass mä na nimmä gseeng  
bloos nuch gands lais hallo schraia höän hodd  
woä unnä hoibdling

---

mid aana rosding klinga  
ausm forrä saim rasirä  
hommä uns di ärmla aufgäriddsd  
un uns gschwöän dass mä  
nii meä ausänandä gee  
- des hodd so a blööda henna  
dauänd im radio gsunga -  
iich woä old schäddähänd  
un deä hainä ausm bosdhof  
woä mai winneduu  
im windä sämmä  
auf aisscholln mid aana boonaschdanga  
hii un heä gäbaddld  
naigfloong halb däsuffn  
badschnoss un dsammgfroän hammkumma  
un schdodds an haasn dee  
örschd moll sai brüch grichd

---

di libelln im summä  
hommä dsä ruu gälössn  
waal uns deä bioleerä gsochd hodd  
di deedn e bloos an dooch leem  
un ausädeem hommsi mä gfalln  
amoll om middooch is a moo  
mid an rood ona schdanga  
auf unnä insl kumma  
un hodd sai hoosndüälä aufgägnöbfd  
un däbai goä ned gämüssd  
wi mä s dähamm dädseeld homm  
hommä nimmä fodd gädäffd dswaa dooch  
un a rächd kombliäds  
wodd is gfalln  
däs hobbi ned amoll im brogghaus gfunna  
füä oosdän hommä balmkädsla gärubbfd  
un's süssa ausdi blüüdn rausgädsülld  
amoll barräfüssich durch di brennessln laafn  
un dswoä schöö longsom  
woä in deä gäng fäbindlich

a endn hommä mid am brüügl  
rundä fom himml kold  
un nochädd widdä bandaschiäd  
un fischla in an mamäladngloos  
mid hamm gäbrochd

un undäs bedd nogschdelld  
dassi kaans sichd  
di woän om näggsdn dooch  
hosd machn könna wosd gäwolld hosd  
immä hii

deä summä hodd sai hoosn naufgägrämbld  
so wi miä  
un unsän boll hodds wennä naigfloong woä  
bis nundän margareddndomm gädriim  
un renna mid so klaana boodla  
aus aanä wunnädüüd  
hommä ausgädroong  
un immä widdä noi brobiäd  
di reechnids aufdsäschdau  
mid an weeä

un dooda fisch mid aufgebläada laibä  
sänn in dä reechnids rumgädrim  
was long nimmä gäreengd kobd hodd  
kannä hodd hammgäwölld dsän feänsee  
juchndschedund un so  
dsägoä di dseä minuddn mid adalberd digghuud  
homm fo uns kan gäraidsd

un schraidärai woä aa  
un dswaa homm immä dsammkolfn  
gee chä an deä wu allaa woä  
un deä - ofd worrä iich -  
hodd gsochd iich dseel bis drai  
un nochäd gee i  
un ewich long äs drai gädeend  
a nuch a o no di nummä kängd  
un di ledsde dsaal haissd numero drai  
obbä di däbbn homm iän kobf kobd  
un niggs drauf geem  
un donn bisd ganga  
un ned gäwissd wos oofanga  
sconds allaa

baim fruchdhoof a boä groosgrüüna banana gschdraachd  
brobiäd wi waid mä middi füüs  
un ona dassi roobolläd fom droddäa  
a büggsn bringd  
a aandsigsmoll bis hamm -  
nuch schnell amoll dsän kuss  
baim bee-eff-dse-blodds  
sich an rollä mid so digga folla raifn ausgälia  
füä a dseenäla di schdund

orrä wenns geld gälängd hodd  
moll a rädla  
un a schabeeso kaffd  
orrä a bägla kaugummi  
middn fridds waldä drinna

un oomds müüd nain bedd gäbolläd  
aufs riddsla dswischä maim forrä un deä murrä  
un gschnarchd  
hommsi om näggsdn dooch dädsäld  
wi a jungs räddsla  
un middn haggi un'n domm  
än mississibbi nundägfoän  
deä hodd aufs hoä wi unnä reechnids ausgschaud  
bloos a wengla braadä  
di dooch di woän wi brausebulfä

Gerhard C. Kinschker